

Peqqussutissatut siunnersuut pillugu oqaaseqaatit

Oqaaseqaatit nalinginnaasut1. Allanguutissatut siunnersuutip siunertaa:

Peqqinnissaqarfiup sullissineri il.il. pillugit Inatsisartut peqqussutaanni (sullissinerit pillugit peqqussummi) § 24 aamma § 25 peqqussut tunngavigalugu akeqanngitsumik ingerlanneqarsinnaanngitsunut akiliutinik akiliisitsiniarsinnaanermut sutigut tunngavissinersut, peqqinnissaqarfiullu sunik isumaqatigiissuteqarnissamut pisinnaatitaaffeqarnera nalornissutigineqarsimapput. Aalajangersakkat taakku pillugit oqaaseqaatit annikitsuinnaasimapput. Taamaattumik Naalakkersuisut aalajangerput peqqinnissaqarfik inatsisitigut sutigut tunngavissaqarnersoq erseqqissarniarlugu, aammalu aalajangersakkat ullutsinnut naleqqussarlugit allangortinniarlugit.

Aammattaaq allanguutissatut siunnersuut napparsimasimasunut naammassineqartumik katsorsartissimasunut peqqinnissaqarfiup suliffeqarfiutaanni najugaqartitsisarnerni atugassarititaasut pillugit kiisalu peqqissaanermi atortussanik, iluaqusersuutinik sullissinernillu allanik akilersillugit tunniunneqartartut pillugit atugassarititaatitaasut pillugit nalunaarusiornikkut maleruagassanik Naalakkersuisut aalajangersaanissamut inatsisitigut tunngavissaannik imaqarpoq. Piginnaatitsinerit taakku peqqinnissaqarfiup sullissineri pillugit peqqussut tunngavigalugu pisussaaffittut sullissinerit saniatigut sullissinerit peqqinnissaqarfiup tunniuttagai pillugit malittarisassanik assigiiaartunik peqqinnissaqarfik aalajangersaasinnaaleqqullugu ilanngunneqarput.

2. Allanguutissatut siunnersuutip pingaarnertut imarisai:

Sullissinerit pillugit peqqussummi atuuttumi, pisuni immikkut illuinnartuni iluaqusersuutinut § 14, nr. 8-mi taaneqartunut Kalaallit Nunaata avataani pisiarineqartunut tapiissuteqartoqarsinnaanera pillugu malittarisassanik Naalakkersuisut nalunaarutikkut aalajangersaanissaannut § 24, imm. 2 inatsisitigut tunngavissiivoq. Inatsisitigut tunngavissatut aalajangersagaq taanna atorneqarsimanngilaq, atorunnaarsinneqarnissaalu siunnersuutigineqarpoq, iluaqusersuutit peqqinnissaqarfiup akilertagaasa tapiissuteqarfigisartagaasaluunniit peqqinnissaqarfikkoortumik pisiarineqartarnerisigut pitsaassutsinik nakkutilliinissaq peqqinnissaqarfiup kissaatigimmagu.

Sullissinerit pillugit massakkut peqqussummi § 25 pisuni sullissinerit pillugit peqqussummi pineqartunut ilaatinneqanngitsuni peqqinnissaqarfiup sullissinerisa akiliuteqartitsilluni tunniunneqartarnissaat pillugu Naalakkersuisut

isumaqatigiissuteqarsinnaanerannut piginnaatitsivoq. § 25-p nutaamik oqaasertalersorneqarnissaa siunnersuutigineqarpoq, isumaqatigiissutit suut peqqinnissaqarfiup isumaqatigiissutisiginnaagai imm. 1-imi nutaami erseqqissarneqarsinnaaqqullugit. Aammattaaq imm. 2-mik nutaamik ikkussisoqarnissaa siunnersuutigineqarpoq, taannalu napparsimasimasunut naammassineqartumik katsorsartissimasunut peqqinnissaqarfiup suliffeqarfiutaani najugaqartitsisarnerit pillugit isumaqatigiissuteqartoqarnissaanut atugassarititaasut kiisalu peqqissaanermi atortussanik, iluaqusersuutinik sullissinernillu allanik tunniussisarnermi atugassarititaasut pillugit malittarisassanik Naalakkersuisut nalunaarusiornikkut aalajangersaanissaannut inatsisitigut tunngavissivoq.

3. Allanguutissatut siunnersuutip pisortat aningaasaqarnerannut aqutsinerannullu kingunerisassai:

Allanguutissatut siunnersuut pisortat aningaasaqarnerannut aqutsinerannullu kinguneqartussaannngilaq.

4. Allanguutissatut siunnersuutip inuussutissarsiortut aningaasaqarnerannut aqutsinerannullu kingunerisassai:

Allanguutissatut siunnersuut inuussutissarsiortut aningaasaqarnerannut aqutsinerannullu kinguneqartussaannngilaq.

5. Avatangiisinut pinngortitamullu kingunerisassai:

Allanguutissatut siunnersuut pinngortitamut avatangiisinullu sunniuteqarnaviannngilaq.

6. Allanguutissatut siunnersuutip aqutsinikkut innuttaasunut sunniutissai:

Allanguutissatut siunnersuut aqutsinikkut innuttaasunut sunniuteqarnaviannngilaq.

7. Allanguutissatut siunnersuutip Naalagaaffeqatigiinnermut namminersornermullu tunngasunut sunniutissai:

Allanguutissatut siunnersuut Naalagaaffeqatigiinnermut namminersornermullu tunngasunut sunniuteqarnaviannngilaq.

8. Pisortani oqartussaasunut suliniaqatigiiffinnullu il.il. tusarniaaneq:

Allanguutissatut siunnersuut Inatsisilerinnermut allaffimmut, Aningaasaqarnermut Pisorta qarfirmut, Peqqissaaveqarfinnik Aqutsivimmut, Dronning Ingridip Napparsimmavissuanut, Peqqinnissakkut Nakkutilliisoqarfimmut, Nakorsat Peqatigiiffiannut, KANUKOKA-mut aamma Ilaqutariinnermut Pisorta qarfirmut tusarniaassutigineqarsimavoq.

Peqqissaaveqarfinnik Aqutsivik oqariartaatsit ilaannik allanngueqqusilluni siunnersuuteqarpoq. Taakku allanguutissatut siunnersuutip suliarineqarnerani ilanngunneqarput. Aammattaaq Peqqissaaveqarfinnik Aqutsiviup oqaatigaa sungiusaaqqinneq peqqinnissaqarfiup akisussaaffigisaa aamma allanngutsaaliiniarluni sungiusarnek napparsimasup nammineq kommunilluunniit akisussaaffigisaa immikkoortisimaneqartariaqartut. Tamanna allanguutissatut siunnersuummi ilanngullugu isiginiarneqarsimannngilaq, tassami killissalersuiniarnermi ilaasut ilagiinnarmassuk ataaseq. Taanna

ilanngunneqaraluarpat killissalersuinerpassuit allat peqqussummi allaaserissallugit tulluanngitsut, ilitersuutitulli ilusilerlugit allaaserineqarnissaminut tulluarnerusut allaaserisariaqalissapput.

Ilaqtariinnermut Pisortaqarfiup erseqqissarlugu oqaatigaa utoqqarnik paaqqinniffiit pillugit peqqussummi taamaallaat pensionisiallit immikkut paaqqutarineqarnissamik pisariaqartitaat pineqartut, paaqqutarineqarnermilu inissat taakkua akii KANUKOKA-mut isumaqatigiinniutigineqartussaasut. Tamanna allannguutissatut siunnersuummi ilanngunneqarpoq.

Inatsisilerinnermi allaffiup inatsisiliornermi teknikkimut tunngasut siunnersuutit arlalialuit saqqummiuppai, allannguutissatullu siunnersuummi ilanngunneqarput.

Dronning Ingridip Napparsimmavissua allannguutissatut siunnersuut pillugu oqaaseqaatissaqanngilaq.

Peqqinnissakkut Nakkutilliisoqarfiup malugeqqullugu oqaatigaa naartunaveersaatitut atortut atorineqarnerisa ilitersuutigineqarnissaat peqqinnissaqarfiup peqqissaaveqarfiisa akeqanngitsumik neqeroorutigisaraat, tak. sullissinerit pillugit peqqussummi § 9. Tamanna § 1-imut, nr. 1-imut oqaaseqaatini titarnertaat aappaanni ilaavoq.

Aningaasaqarnermut Pisortaqarfiup apeqqutigisimavaa inatsisip oqaasertaasa ersarissarneqarnerat peqqinnissaqarfiup isertitassaasa amerleriarnernik nassataqassannginnersoq. Inatsisip oqaasertaasa ersarissarneqarnerat amerlanerusunik isertitaqarnermik kinguneqassanngilaq, peqqinnissaqarfiulli suut akilersinniarsinnaaneraai pillugit oqallittarnissat arlallit pinngitsoortissavai.

Peqqussutissatut siunnersuummi aalajangersakkat ataasiakkaat pillugit oqaaseqaatit

§ 1 pillugu

Nr. 1 pillugu

Sullissinerit pillugit peqqussummi atuuttumi § 24 imm. 1-imik aamma imm. 2-mik immikkoortoqarpoq. Sullissinerit pillugit peqqussummi massakkut atuuttumi § 24, imm. 1-ip oqaasertai allannguutissatut siunnersuummi § 24-kkut allannguuteqartinnagit ingerlateqqinneqarput, inatsisitigut tunngavissaq naammattumik ersarissuseqarmat. Taamaalilluni § 24 ataasiinnarmik immikkoortoqalerpoq.

Sullissinerit pillugit peqqussut kapitalini ataasiakkaani akeqanngitsunik sullissinissamat pisinnaatitsivoq. Kapitali 3 naartusunik ernisunillu misissuisinnaatitsivoq kiisalu naartunaveersaarneq pillugu akeqanngitsumik

ilitsersuisinnaatitsilluni. Kapitali 4-p meeqqat inuusuttullu 18-it inorlugit ukiullit akeqanngitsumik peqqissutsikkut misissorneqarsinnaatippai peqqissarneqarsinnaatillugillu. Kapitali 6 akeqanngitsumik kigutileritinnissamut pisinnaatitsivoq, kapitali 7-ilu napparsimasunik nakorsap aalajangiineratigut angallassisinnaatitsilluni. Siunnersuummi § 24 Naalackersuisunut inatsisitigut tunngavissiivoq sullissinernut peqqussut manna tunngavigalugu akeqanngitsumik ingerlanneqarsinnaanngitsunut akiliuteqartitsisarneq pillugu malittarisassanik aalajangersaanissaannut.

Tassa imaappoq sullissinernut § 14-imi taaneqarsimasunut Naalackersuisut akiliisitsiniarsinnaasut.

Sullissinerit pillugit peqqussummi § 14 pissutsit atuuttut tamanna ajornartinnigippassuk sullissisinnaatitsivoq. Taamaalilluni § 24-p Naalackersuisut inatsisitigut tunngavissippai, aningaasaqarnikkut suliatigullu naliliisoqareerneratigut, sullissinernik § 14-imi taaneqartunik neqerooruteqarnissaannut, tassalu peqqissutsikkut pinaveersaartitsisumik misissuinernik, nakorsamit katsorsarneqarnermik, napparsimmavimmi katsorsarneqarnermik, orniguttarluni peqqissaanermik, meeqqanik peqqissaanermik napparsimasunillu peqqissaanermik, nakorsat allagartaliineratigut nakorsaatiniq, akiuussutissanik kapuinernik, iluaqusersuutiniq aalajangersimasunik, eqaarsaartitsinikkut katsorsaanermik aamma allagartaliinernik, akeqanngitsumik akiliuteqartitsinikkulluunniit.

Malittarisassatigut erseqqissarneqarpoq innuttaasut peqqussut manna tunngavigalugu peqqinnissakkut sullinneqarsinnaatitaasut, assersuutigalugu nakorsamit katsorsarneqarnermik tamanik sullinneqarsinnaatitaanngitsut. Katsorsaaneq pisariaqarluinnartuunngimmat, imaluunniit katsorsaanermut aningaasartuutit peqqissutsip pitsanngoriaatigisinnaasaanut sanilliullugit naapertuuttuunngimmata. Taamaattorli innuttaasut peqqissutsikkut inuunerissusiat tamatigut aqutsisuusutut ilaatinneqartassaaq.

§ 14-ikkut aalajangersarneqarpoq peqqinnissaqarfik ilaatigut pisussaaffeqartoq napparsimmavimmi katsorsaanissamut, pissutsit tamanna ajornartinnigippassuk. Peqqinnissaqarfik napparsimmavimmi katsorsaassalluni pisussaaffeqarpoq, napparsimasup naammassillugu katsorsarneqarnissaata angerlartinneqarnissaminullu piareernissaata tungaanut. Napparsimasup napparsimmavimmi uninnganermi angerlartinneqarnissaminut piareerneranik oqarnermi pineqarpoq peqqinnissaqarfik katsorsaaneq aqutugalugu napparsimasumik peqqinnerulersitseqqissinnaajunnaartoq uninngatitsiinnarnermigut. Tassa imaappoq misissuinernik neqerooruteqaqqittoqarsinnaajunnaartoq, pilattaaqqittoqarsinnaajunnaartoq assigisaanillu iliuuseqaqqittoqarsinnaajunnaartoq. Napparsimasoq sungiusaqinneqassappat katsorsaaneq naammassisutut isigineqassaaq, nakorsap naliliinera aallaavigalugu katsorsaqqinneq peqqinnerulernermik nassataqarsinnaanngippat.

Peqqinnissaqarfimmi sullissinerit atuisullu akiliuteqartarnerat pillugit nalunaarut nr. 5, 15. februar 2006-imeersoq suliarineqarsimavoq sullissineq pillugu peqqussummi massakkut atuuttumi ilaatigut § 24, imm. 1 tunngavigalugu, nalunaarullu taanna

peqqinnissaqarfimmi sullissinerit atuisullu akiliuteqartarnerat pillugit nutaamik peqqussusiornermut atatillugu atorunnaarsinneqassamaarpoq.

Sullissinerit pillugit peqqussummi massakkut atuuttumi § 24, imm. 2 iluaqusersuutinut § 14-imi, nr. 8-mi taaneqartunut Kalaallit Nunaata avataani pisiarineqartunut tapiissuteqarnissamut Naalakkersuisunut piginnaatitsivoq. Piginnaatitsineq taanna atorneqarsimanngilaq, atorneqarnaviaranilu, tassami iluaqusersuutit pisortat aningaasalersugaasa (aningaasaleeqataaffigisaasa) pitsaasuunissaat peqqinnissaqarfiup qulakkeerusummagu, tamannalu peqqinnissaqarfimmit innersuussisoqarnissaanik piumasaqaateqarnikkut qulakkeerneqarluni. Aalajangersakkap taassuma atorunnaarsinneqarnissaa taamaattumik kissaatigineqarpoq. § 24, imm. 2-p atorunnaarsinneqarnerata innuttaasut Danmarkimiinnerminni iluaqusersuutinik inniminniinissaannut akornusinnilai, iluaqusersuulli taanna peqqinnissaqarfiup akilissappagu peqqinnissaqarfiup nioqquteqartumut innersuussisimanissaa piumasaqaataavoq, tamannalu periaatsinik atuuttunik allanngortitsinngilaq.

Nr. 2 pillugu.

Imm. 1.

Sullissinerit pillugit peqqussummi atuuttumi § 25-p sullissinernik sullissinerit pillugit peqqussummi pineqartunut ilaanngitsunik akilersillugit tunniussinissaq pillugu Naalakkersuisut isumaqatigiissuteqarsinnaatippai. Sullissinerit suut, akeqanngitsumik akilersillugilluunniit, peqqinnissaqarfimmit pisussaaffigineqartutut sullissinerit pillugit peqqussummi allaaserineqarnerat taamaalilluni sukumiisuvoq. Sullissinerit pillugit peqqussummi massakkut oqaasertaliineq "peqqinnissaqarfimmit sullinneqarsinnaanermut" allannguutissatut siunnersuummi "atortussanik, iluaqusersuutinik peqqissaanermi atortussanik kiisalu sullissinernik allanik tunisineq"-mut allanngortinneqarsimavoq, sullissinerit suut Naalakkersuisut isumaqatigiissuteqaatigisinnaagaat erseqqissarniarlugu. Peqqinnissaqarfiup sullissineri nalinginnaasumik peqqinnissaqarfimmut isumaqatigiissutigineqartarput, tassanilu Peqqissutsimut Pisortaqarfik, Dronning Ingridip Napparsimmavissua, Peqqissaaveqarfinnik Aqutsivik, sinerissami napparsimmaviit/ peqqissaaviit tamarmik kiisalu kigutileriffiit tamarmik ilaatinneqarput. Peqqinnissaqarfiup suliffeqarfiata sorliup isumaqatigiissuteqarnissaani isumaqatigiissutip sumut tunngasuunera apeqqutaavoq.

Napparsimasut naammassillugit katsorsarneqarsimasut angerlarsimaffimmini nammineersinnaanngitsut paaqqutarinniffittut angerlarsimaffimmi, innarluutilinnik paaqqinniffimmi imaluunniit utoqqarnik paaqqinniffimmi najugaqarnissamik pisariaqartitsisuupput. Oqartussaasoq paaqqutarinniffittut angerlarsimaffimmut, innarluutilinnik paaqqinniffimmut imaluunniit utoqqarnik paaqqinniffimmut akisussaasuusooq napparsimasumut naammassillugu katsorsarneqarsimasumut inissamik pissarsisinnaanngippat, peqqinnissaqarfiup oqartussaasut akisussaasuusut napparsimmavimmi sivisunerusumik uningasariaqarneq pillugu isumaqatigiissuteqarfigisariaqarpai, napparsimasup ulloq angerlartinneqarfissaralua aallarnerfigalugu akiliuteqarfigineqartussamik.

Peqqinnissaqarfik oqilisaassinermi akiliuteqarluni najugaqartitsineq pillugu aamma isumaqatigiissuteqarsinnaasussaavoq, akiliutillu taakku inunnt paaqqutarineqarnissamik pisariaqartitsisunut, angerlarsimaffimmini paaqqutarineqartunut naatsorsuussaapput. Ilaqutaasut sulinngiffeqarnermik nalaani imaluunniit inuup paaqqutarineqarnissamik pisariaqartitsisup paaqqutarineqarnerata ilaqutariinnut nanertuutaavallaarnera pissutigalugu oqilisaanneqarnissamik pisariaqartitsisinnaapput. Oqilisaassilluni najugaqartitsineq inuup paaqqutarineqarnissamik pisariaqartitsisup paaqqutarinniffittut angerlarsimaffimmut ataavartumik inissineqarneranik pinngitsoortitsisinnaavoq. Oqilisaassilluni najugaqartitsinissaq ilaqutariinnut kommunimulluunniit isumaqatigiissutigineqarsinnaavoq. Oqilisaassilluni najugaqartitsinissap isumaqatigiissutigiginissaa ilaqutaasut kissaatigippassuk, kommunillu akiliinissani kissaatiginngippagu, ilaqutaasut aningaasartuut taanna namminneq akilissavaat. Kia akiliisusnaanera oqilisaassilluni najugaqartitsinerup aallartinnginnerani isumaqatigiissutigineqareersimassaaq.

Kommuni paaqqutarisarialinnut angerlarsimaffimmi naammattunik inissaateqanngippat immikkoortortamik immikkoortortaqarfimmilluunniit kommunimi napparsimasunut paaqqutarisarialinnut atugassiinissaq peqqinnissaqarfiup isumaqatigiissutigisinnaavaa. Taamaaliortoqarpat immikkoortortaq imaluunniit immikkoortortaqarfik taanna paaqqutarisarialinnuinnnaq immikkoortortaqarfinngortinneqassaaq, pisariaqartitsineq naapertorlugu iluarsaanneqarsinnaasoq.

Uninnganerup sivitsorneqarnissaa, oqilisaassilluni uninngatitsinerit aamma paaqqutarisarialinnut immikkoortortaqarfiit pillugit isumaqatigiissutit peqqinnissaqarfiup napparsimmaviinit peqqissaaviinillu tamanit isumaqatigiissutigineqarsinnaapput. Taamaattorli isumaqatigiissuteqassagaanni piumasaqaataavoq paaqqinniffik/suliffeqarfik pineqartoq inissanik piffissami sivikinnerusumi sivilunerusumiluunniit atugassaqartitsissasoq, kiisalu suliassap naammassinnaanut pisariaqartinneqartunik sulisoqassasoq.

Peqqinnissaqarfimmi paaqqutarineqarnermut akit aalajangersarneqarneranni napparsimmaviit peqqissaaviillu ingerlatsinermut aningaasartuutaat napparsimasullu ataasiakkaat peqqinnissaqarfimmut qanoq pisarissersuutaatiginerat aalajangiisuussapput. Paaqqutarisarialimmut inissap nalinginnaasup akissaa allaasoq aamma annertuumik paaqqutarisarialimmut inissap akissaa allaasoq peqqinnissaqarfiup aalajangersarsinnaavai. Napparsimasoq annertuumik paaqqutarisarialik tassaavoq inummit allamit ullup unnuallu ingerlanerani nalunaaquttap akunneri arfineq pingasut sinnerlugit ikiorneqarnissamik aamma/imaluunniit paaqqutarineqarnissamik pisariaqartitsisoq.

Paaqqutarinninnissamut periarfissat taakku paaqqutarinninnissamut periarfissanut utoqqarnik paaqqinniffiit pillugit inatsisartut peqqussutaanni atuuttumi nr. 11-mi, 30. oktober 1998-imeersumi allaaserineqarsimasunut peqatigitillugit piupput. Taamaattorli utoqqarnik paaqqinniffiit pillugit peqqussummi malittarisassat taamaallaat pensionisiaqartunut paaqqutarineqarnissamik immikkut ittunik pisariaqartitsisunut atuupput. Sullissinerit pillugit peqqussummi malittarisassat

inunnut paaqqutarineqarnissamik pisariaqartitsisunut
paaqqinniffimmi/suliffeqarfimmi naleqquttumi imaaliallaannaq
inissaqartinneqanngitsunut tamanut atuupput. Peqqinnissaqarfiup suliffeqarfiutaani
paaqqutarineqarluni uninnganermut akigitinneqartut

KANUKOKA-lu isumaqatigiissutigineqartussaammata taakku utoqqarnik
paaqqinniffiit pillugit peqqussummi malittarisassanut assortuuttuusussaangillat.

Napparsimasut uninngasut peqqissaanermi atortussanik iluaqusersuutinillu taakku
pisariaqartitaannik pilersuineq peqqinnissaqarfiup isumagissavaa, napparsimasorli
angerlartinneqarniariapat atortussanut, iluaqusersuutinut peqqinnissaanermilu
atortussanut aningaasartuutit napparsimasup nammineq, kommuniq imaluunniit
Ilaqutariinnermut Pisortaqaarfiup aningaasartuutigilissavai. Atortut taakku
peqqinnissaqarfimmit tunniunneqarnissaat kissaatigineqarpat taakku
akilerneqartassapput.

Peqqinnissaqarfiup pigisani sulisunilu allanik neqerooruteqarnermut aamma
atorsinnaavai. Napparsimmaviit amerlanersaat atortorissaaruteqarlutillu atortoqarput
suliffeqarfimmit/paaqqinniffimmit allanik iluaqutigineqarsinnaasunik. Taamaalilluni
peqqinnissaqarfiup errorsissussinerit, biiliniq assartuinerit, nerisassat allallu
neqeroorutigisinnaavai. Sullissinernik taakkuninnga tuniniaanerup
peqqinnissaqarfiup pingaarnertut sullissineri ajornerulersissanngilai, kiisalu
illoqarfimmi nunaqarfimniluunniit inuussutissarsiuutigalugu taamatut
neqerooruteqarfiusuni neqeroorutigineqassanatik, tuniniaaneq
Namminersornerullutik Oqartussat, kommunit naalagaaffiullu ataanni pisortat
suliffeqarfiinut sammitinneqanngippat.

Imm. 2.

Sullissinerit pillugit peqqussummi massakut atuuttumi aalajangersagaq taamaallaat
isumaqatigiissuteqarsinnaatitsivoq, peqqinnissaqarfiulli sullissinerinik tunisineq
pillugu isumaqatigiissuteqarnermi atugassarititaasut suut
eqqortinneqarsimanissaannik piumasaaqateqarnissamut inatsisitigut
tunngavissaliinani.

Allannguutissatut siunnersuummi imm. 2-mi oqaaseqatigiit siulliit Naalackersuisut
piginnaatippaat napparsimasimasunut naammassineqartumik katsorsartissimasunut,
inuit paaqqutarinninnissamik pisariaqartitsisut oqilisaassilluni
uninngatittarnissaannut kiisalu paaqqutarinniffissatut immikkoortortanik
pilersitsinissat pillugit ataasiakkaartunik ataatsimoorussanillu
isumaqatigiissuteqarnermi atugassarititaasut pillugit malittarisassanik
aalajangersaanissaannut.

Sivisunerumik uninnganissani, oqilisaassilluni najugaqartitsinerni
paaqqutarinniffittullu immikkoortortaqaarfinni atugassarititaasut pillugit
malittarisassat napparsimasut paaqqutarisariallit peqqinnissaqarfiup
suliffeqarfiutaani uninngatinnissaannut peqqinnissaqarfiup piumasaaqatai
allaaserissavai, assersuutigalugu kikkut paaqqutarisariallittut inissamik
tunineqarsinnaasut, paaqqutarisariallittut inissap qaqugukkut

aalajangiiffigineqarsimanissaa kiisalu akiliuteqartitsinerup naatsorsorneqarnera qaqugumiit aallartissasoq.

Imm. 2-mi oqaaseqaatigiit aappaat. Napparsimasoq naammassillugu katsorsarneqarniariarpat angerlartinneqarniariarpallu atortussanut, iluaqusersuutitut peqqissaanermilu atortussanut aningaasartuutitut akisussaaffik napparsimasumi namminermiiliissaaq, kommunimiilissaaq imaluunniit Ilaqutariinnermut Pisorta qarfirmiilissalluni. Kommuni imaluunniit Ilaqutariinnermut Pisorta qarfik aningaasartuutitik akiliisuusassapat atortussat, iluaqusersuutit peqqissaanermilu atortussat peqqinnissa qarfimit/peqqissaavimmit pisiarinqarnissaat kommuni imaluunniit Ilaqutariinnermut Pisorta qarfik sinnerlugu isumaqatigiissutigineqassaaq, imaluunniit kommunimut Ilaqutariinnermullu Pisorta qarfirmut tuniniaaqqinnissaaq siunertaralugu isumaqatigiissuteqartoqassalluni. Taamaattorli napparsimmaviit peqqissaaviillu pisussaaffiligaanngillat atortussanik, iluaqusersuutitik peqqissaanermilu atortussanik kommuni Ilaqutariinnermulluunniit Pisorta qarfik sinnerlugu pisinissamut. Peqqissaanermi atortussat pisariaqartititik inuinaat niuertarfinni pisiarisinnaanngikkunikkit napparsimmavimmi pisiarisinnaavaat.

Atortussanik, peqqissaanermi atortussanik, iluaqusersuutitik sullissinerillu allanik akiliinikkut tunniussinermi atugassarititaasut pillugit malittarisassat sukumiisuusinnaanngillat, tassami sullissineq nutaaq pillugu isumaqatigiissuteqarsinnaanissaaq pisariaqartinneqartuaannartussaammat. Isumaqatigiissuteqarnermi aalajangiisuusoq tassaavoq sullissineq tunniunneqartussaaq peqqinnissa qarfiup sulisuisa sullissinerit pillugit peqqussut tunngavigalugu pisussaaffimminnik naammassinninnissaannut piffissamut aningaasaqarnermullu akornusiisuussannginnera.

Peqqissaanermi atortussat, iluaqusersuutit sullissinerillu allat akiliuteqarnikkut tunniunneqartarneranni atugassarititaasut pillugit nalunaarut atortussanik, peqqissaanermi atortussanik iluaqusersuutinillu pisinermi toqqortarinninnermilu kiisalu peqqinnissa qarfiup, kommunip imaluunniit Ilaqutariinnermut Pisorta qarfiup pisariaqartinneqartoq napparsimasup angerlartinneqarnerani ingerlaannaq pissarsiarisinnaanngippagu atukkiussigallarnermi atugassarititaasut pillugit malittarisassanik ilaatigut imaqaassaaq.

Siunnersuutigineqarpoq Inatsisartut peqqussutaat 1. januar 2007-imi atuutilissasoq.